Vindhya Telelinks Limited
Regd. Office : Udyog Vihar, P.O. Chorhata,
Rewa - 486 006 (M.P.) India.
Tel. : (07662) 400400 · Fax : (07662) 400591
E-Mail : headoffice@vtlrewa.com · Website : www.vtlrewa.com
PAN No. AAACV7757J · CIN No. L31300MP1983PLC002134
GSTIN : 23AAACV7757J1Z0

VTL/CS/25-26/Reg-47

7 FEB 2026

BSE Ltd.
Corporate Relationship Department
1st Floor, New Trading Ring,
Rotunda Building
P.J. Towers, Dalal Street,
Fort,
MUMBAI-400 001

Company's Scrip Code: 517015

The Manager,
Listing Department,
The National Stock Exchange of India Ltd.,
Exchange Plaza, C-1, Block G,
Bandra Kurla Complex,
Bandra (E),
MUMBAI-400 051

Company's Scrip Code: VINDHYATEL

Dear Sir/Madam,

Sub: Newspaper Publication – Unaudited Standalone and Consolidated Financial Results for the quarter and nine months ended on 31st December, 2025

Pursuant to Regulation 47 and Regulation 30 read with Schedule III of the SEBI (Listing Obligations and Disclosure Requirements) Regulations, 2015, please find enclosed copies of the Newspaper Publication of the Unaudited Standalone and Consolidated Financial Results of the Company for the quarter and nine months ended on 31st December, 2025 published in Newspapers viz. – Financial Express (in English) and Dainik Jagran (in Hindi) on 7th February, 2026.

We request you to kindly take the above on record and oblige.

Thanking you,

Yours faithfully,
For Vindhya Telelinks Limited

(Dinesh Kapoor)
Company Secretary & Compliance Officer

Encl: As above.

मोबाइल ऐप से करेंगे ऑनलाइन निगरानी

ग्रामीण अंचल पर हुआ प्रश्न पत्रों का वितरण पेटी और ताला लेकर पहुंचे केन्द्राध्यक्ष

परीक्षा सम नंबर फार्मूले पर होगी, प्रश्नपत्रों की पैकिंग डबल की

जागरण,रीवा

आगामी 10 फरवरी से शुरू होने वाली 10वीं व 12वीं की परीक्षा में पेपर लीक जैसी घटनाओं को रोकने इस बार माध्यमिक शिक्षा मंडल काफी सख्त है। मंडल ने पेपर लीक नहीं हो इसके लिए इस बार प्रश्नपत्रों की पैकिंग डबल की है। प्रश्नपत्र जिला समन्वयक संस्थाओं को केंद्रवार बाक्स में दिए जा रहे है। इनको तिथिवार सील्ड बाक्स में रखा है। शुक्रवार को इन बाक्स को ग्रामीण अंचल के परीक्षा केंद्रों के केंद्राध्यक्षों को वितरित किया गया। इन सील्ड बाक्स को लोहे की पेटी में सुरक्षित रखा है, जिसे संबंधित पुलिस थाने में जमा किया जाएगा। परीक्षा वाले दिन ही प्रश्नपत्रों के पैकेट संबंधित परीक्षा कक्ष में खोले जाएंगे। यह सब कलेक्टर प्रतिनिधि की उपस्थिति में होगा। शुक्रवार को मार्तंड क्रमांक एक से प्रश्न पत्रों का वितरण किया गया। बताया गया कि 71 ग्रामीण अंचल के केन्द्रों के लिए प्रश्न पत्रों का वितरण किया गया। सुबह 11 बजे से शुरु हुई प्रक्रिया करीब शाम 7 बजे तक चलती रही। केन्द्राध्यक्ष पेटी और ताला लेकर पहुंचे। आज शहरी क्षेत्र के केन्द्रों के प्रश्न पत्रों का वितरण किया जाएगा।

बोर्ड परीक्षाओं के लिए प्रश्न पत्र का वितरण किया गया है, शुक्रवार को ग्रामीण क्षेत्र के केन्द्राध्यक्षों को प्रश्न पत्र सौंपे गए हैं। आज शहरी क्षेत्र के केन्द्राध्यक्षों को प्रश्न पत्र दिए जाएंगे। तैयारियों को अंतिम रूप दिया जा रहा है।
रामलाल प्रसाद मिश्रा
डीईओ रीवा।

इस फार्मूले पर होगी परीक्षा

इस बार परीक्षा ईवन (सम नंबर) फार्मूले पर होगी। परीक्षा कक्ष में 20, 40 या 60 परीक्षार्थी बैठेंगे। यानी विषम संख्या नहीं होगी। प्रश्न-पत्र चार सेट में मिलेंगे। प्रश्नपत्र के बंडल परीक्षा कक्ष के बाहर न खोलना पड़े इसके इंतजाम किए गए हैं। एक बंडल 20 प्रश्नपत्र कम अलग चार सेट में होंगे। प्रश्न सभी में एक जैसे होंगे लेकिन इनका क्रम बदला रहेगा। इससे आगे-पीछे और दोनों ओर परीक्षा देने वालों को अलग-अलग सेट का पेपर मिलेगा। प्रश्नपत्रों का बंडल खुलने के बाद उसे बाहर नहीं ले जा सकते है।

लोकेशन भी ट्रेस करेंगे

परीक्षा में तैनात सभी अधिकारी के मोबाइल पर मंडल का ऐप डाउनलोड रहेगा। ऐप से पुलिस थाने से प्रश्न-पत्र के निकलने की एंट्री, केंद्रों पर प्रश्न-पत्र खोलने से लेकर वितरण की एंट्री, परीक्षा खत्म होने के बाद बंडल बनने और मूल्यांकन केंद्र पर जमा करने तक की एंट्री की जाएगी। यहां तक कि हर प्रश्नपत्र के बंडल लोकेशन भी ट्रेस होगी। इसके अलावा कलेक्टर प्रतिनिधि और उड़नदस्तों की मॉनिटरिंग भी ऐप के माध्यम से की जाएगी। प्रश्नपत्र बंडलों को थाना से निकालकर केंद्र तक पहुंचाने और वितरण तक कलेक्टर प्रतिनिधि की भूमिका महत्वपूर्ण होगी।

53821 छात्र देंगे परीक्षा

बता दें कि रीवा व मऊगंज जिले के कुल 53821 छात्र परीक्षा देंगे। जिसमें कक्षा 10वीं के 29653 छात्र व कक्षा 12वीं के 24168 छात्र परीक्षा देंगे। इसके लिए जिले में 94 परीक्षा केन्द्र बनाए गए हैं। इनमें 71 रीवा व 23 केन्द्र मऊगंज जिले में बनाए गए हैं। 12 केन्द्र संवेदनशील व अति संवेदनशील हैं। परीक्षा की तैयारी लगभग अंतिम चरण में हैं।

6 जिलों के नर्सिंग कॉलेजों से एफीलेशन के लिए 15 फरवरी तक मंगाए आवेदन

वर्ष 2025-26 के लिए मान्यता व नवीनीकरण की होगी प्रक्रिया

जागरण,रीवा। नर्सिंग और पैरामेडिकल कोर्स अब अवधेश प्रताप सिंह विश्वविद्यालय के जिम्मे आ गया है। इस संबंध में विश्वविद्यालय की तरफ से अधिसूचना जारी करते हुए रीवा, सतना, सीधी, मऊगंज, सिंगरौली व मैहर के सभी नर्सिंग कॉलेजों को निर्देश दिए गए हैं कि वे 15 फरवरी तक हर हाल में एफीलेशन प्राप्त करने के लिए ऑनलाइन आवेदन कर दें। एपीएसयू के रजिस्ट्रार द्वारा जारी किए गए आदेश में कहा गया है कि कार्यालय आयुक्त उच्च शिक्षा मप्र शासन भोपाल के पत्र के अनुपालन में विश्वविद्यालय के क्षेत्राधिकार अंतर्गत जिलों में संचालित नर्सिंग महाविद्यालयों को अवधेश प्रताप सिंह विश्वविद्यालय रीवा से सत्र 2025-2026 में संबंधित पाठ्यक्रमों की प्रथम वर्ष की सम्बद्धता-निरंतरता प्राप्त करने हेतु आवेदन करने के लिए अंतिम तिथि 15 फरवरी निर्धारित की गई है। नर्सिंग पाठ्यक्रमों को संचालित करने वाले महाविद्यालय को पोर्टल पर आवेदन शुल्क जमा कर पंजीयन करना होगा जिसके बाद प्रत्येक महाविद्यालय को लॉगिन आईडी जारी किया जाएगा।

पहले एपीएसयू के ही अंडर में था नर्सिंग

पूर्व में नर्सिंग-पैरामेडिकल की पढ़ाई से संबंधित कोर्स एपीएसयू द्वारा ही संचालित किए जाते थे लेकिन वर्ष 2011 में मप्र मेडिकल साइंस यूनिवर्सिटी की स्थापना के साथ ही कुछ वर्षों के अंतराल में इन्हें एमयूएसयू से संचालित किया जाने लगा। अब एक बार फिर इसे एपीएसयू के हवाले किया गया है।

काफी देरी से कार्य हो रहे

शिक्षा विभाग द्वारा जारी शेड्यूल के मुताबिक एपीएसयू से संबद्ध नर्सिंग-पैरामेडिकल कॉलेजों में सत्र 2025-26 के लिए 1 नवंबर 2025 से नियमित क्लासेस शुरू होनी थी। इसके पूर्व एपीएसयू को 1 सितंबर से 15 अक्टूबर 2025 के बीच नर्सिंग व पैरामेडिकल कॉलेजों को संबद्धता देनी थी और एडमिशन के लिए काउंसलिंग 1 अगस्त से 15 अक्टूबर 2025 के बीच पूरी होनी थी, हालांकि कुछ बिंदुओं पर स्पष्ट जानकारी के अभाव में यह संभव नहीं हो सका।

क्षेत्राधिकार अंतर्गत जिलों में संचालित नर्सिंग महाविद्यालयों को अवधेश प्रताप सिंह विश्वविद्यालय रीवा से सत्र 2025-2026 में संबंधित पाठ्यक्रमों की सम्बद्धता-निरंतरता प्राप्त करने हेतु आवेदन मांगे गए हैं। अंतिम तिथि 15 फरवरी निर्धारित की गई है।
डॉ.सुरेन्द्र सिंह परिहार
कुलसचिव एपीएसयू।

ग्रामीण कृषि कार्य अनुभव के अंतर्गत भजन संध्या एवं सांस्कृतिक आयोजन

रीवा। डीन, कॉलेज ऑफ एग्रीकल्चर डॉ. एस. के. त्रिपाठी, कृषि विज्ञान केंद्र के प्रमुख डॉ. ए. के. पांडेय, कार्यक्रम समन्वयक डॉ. संजय सिंह एवं रावे कार्यक्रम के प्रभारी डॉ. संदीप शर्मा के मार्गदर्शन में ग्रामीण कृषि कार्य अनुभव (रा वे) कार्यक्रम के अंतर्गत ग्राम स्तर पर भव्य भजन संध्या का आयोजन किया गया। इस आयोजन का मुख्य उद्देश्य ग्रामीण क्षेत्र में भारतीय संस्कृति, परंपराओं एवं संस्कारों को संरक्षित करना, साथ ही युवाओं को सामाजिक एवं सांस्कृतिक गतिविधियों से जोड़ना रहा। कार्यक्रम के दौरान सभी छात्राओं द्वारा भक्तिमय, भावपूर्ण एवं सुरम्य भजनों की प्रस्तुति दी गई, जिससे संपूर्ण ग्राम का वातावरण आध्यात्मिक ऊर्जा और सकारात्मकता से परिपूर्ण हो गया। भजन संध्या में ग्राम के वरिष्ठ नागरिकों एवं बुजुर्गों की विशेष उपस्थिति रही। उन्होंने छात्राओं को आशीर्वाद प्रदान करते हुए कहा कि इस प्रकार के आयोजन पीढ़ियों के बीच सांस्कृतिक सेतु का कार्य करते हैं और युवाओं को अपनी जड़ों से जोड़े रखते हैं। ग्रामीणों द्वारा इस पहल की मुक्तकंठ से सराहना की गई। कार्यक्रम के आयोजन में ग्रुप लीडर वंशिका तिवारी के साथ अनुराधा, इशिका, पूर्णिमा, सिद्धिका, सुमन, महिमा, ज्योति, आंचल सहित अन्य छात्राओं की सक्रिय सहभागिता रही। सभी छात्राओं ने एकजुट होकर कार्यक्रम को सफल बनाया और भविष्य में भी इस प्रकार के सांस्कृतिक आयोजनों को निरंतर जारी रखने की प्रतिबद्धता व्यक्त की।

पिट्ठू में सीधी बना संभाग स्तरीय चैंपियन

जागरण,रीवा। उच्च शिक्षा विभाग के निर्देशानुसार शासकीय ठाकुर रणमत सिंह महाविद्यालय में संभाग स्तरीय पिट्ठू (पुरुष/महिला) प्रतियोगिता का आयोजन किया गया। जिसमें अच्छे खेल का प्रदर्शन करते हुए सीधी की टीम ने संभाग स्तरीय चैंपियन का गौरव अपने नाम किया। पुरुष व महिला दोनों वर्ग में सीधी की टीम चैंपियन रही। वहीं रीवा की टीम दोनों वर्ग में उपविजेता रही व सतना को तृतीय स्थान मिला। प्रतियोगिता का आयोजन लीग पद्धति से किया गया। प्रतियोगिता के समापन अवसर पर प्राचार्य डॉ.अर्पिता अवस्थी बतौर मुख्य अतिथि मौजूद रहीं, विशिष्ट अतिथि के रूप में डॉ.महानंद द्विवेदी, डॉ.अच्युत पांडेय सहित अन्य मौजूद रहे। आयोजक सचिव डॉ.रावेन्द्र सिंह द्वारा उपस्थित अतिथियों का स्वागत किया गया व प्रतियोगिता के संबंध में विस्तृत जानकारी दी गई। मुख्य अतिथि ने खिलाड़ियों को पुरस्कृत किया और आगामी प्रतियोगिताओं में अच्छा प्रदर्शन करने के लिए प्रोत्साहित किया। उन्होंने हार की परवाह न किए बिना आगे बढ़ने की बात कही। प्रतियोगिता के सफल आयोजन में अग्रणी महाविद्यालय के वरिष्ठ क्रीड़ा अधिकारी डॉ.हबीब खान, डॉ.राजेश भारती, दिव्यगवां से डॉ.विजय सिंह, गोविंदगढ़ से डॉ.शहबाज खान, देवतालाब से डॉ.रविकांत चौधरी सहित अन्य महाविद्यालयों के क्रीड़ा अधिकारी व स्टाफ मौजूद रहे। प्रतियोगिता के दूसरे दिन आज खिलाड़ियों का चयन राज्य स्तरीय प्रतियोगिता के लिए किया जाएगा। आयोजक सचिव डॉ.रावेन्द्र सिंह के कुशल मार्गदर्शन में प्रतियोगिता का आयोजन किया गया।

महिला व पुरुष वर्ग में रहा विजेता, रीवा को उपविजेता का खिताब

टीआरएस कॉलेज में दो दिवसीय महोत्सव आज से

व्यवसाय प्रशासन विभाग करेगा आयोजन

जागरण,रीवा। शासकीय ठाकुर रणमत सिंह महाविद्यालय के व्यवसाय प्रशासन विभाग द्वारा विद्यार्थियों के सर्वांगीण विकास को ध्यान में रखते हुए दो दिवसीय प्रबंधन महोत्सव 'इनोवेट टू लीड' का आयोजन 7 एवं 8 फरवरी को किया जा रहा है। इस महोत्सव का मुख्य उद्देश्य विद्यार्थियों में नवाचार की भावना, व्यावहारिक सोच, नेतृत्व क्षमता तथा आत्मनिर्भरता को प्रोत्साहित करना है। महोत्सव के प्रथम दिवस 7 फरवरी को महाविद्यालय के दरबार हॉल में उद्घाटन सत्र आयोजित किया जाएगा। इस अवसर पर मुख्य अतिथि रमेश सिंह विन्ध्या टेलीकाम लिमिटेड रीवा का प्रेरणादायक उद्बोधन, विद्यार्थियों के साथ संवाद तथा अनुभव साझा करने का कार्यक्रम प्रस्तावित है। कार्यक्रम के दौरान छात्रों को नेतृत्व, करियर मार्गदर्शन एवं प्रबंधन के व्यावहारिक पक्षों से अवगत कराया जाएगा। पहले दिन के द्वितीय सत्र में सांस्कृतिक कार्यक्रमों के अंतर्गत नृत्य, गीत एवं फैंसी ड्रेस प्रतियोगिता आयोजित की जाएंगी, जिनमें व्यवसाय प्रशासन विभाग के विभिन्न विद्यार्थी भाग लेंगे। साथ ही शैक्षणिक गतिविधियों में एक्सटेम्पोर भाषण, क्विज प्रतियोगिता एवं अन्य अकादमिक कार्यक्रम भी आयोजित किए जाएंगे, जिससे छात्रों की बौद्धिक क्षमता एवं आत्मविश्वास में वृद्धि हो सके। महोत्सव के द्वितीय दिवस 8 फरवरी को इस दिन अतिथि एवं पूर्व छात्र भी विद्यार्थियों को संबोधित कर अपने अनुभव साझा करेंगे। इस दिनांक के द्वितीय सत्र में खेल गतिविधियों का आयोजन महाविद्यालय के महात्मा गांधी प्रतिमा के सामने किया जाएगा। खेल प्रतियोगिताओं में रस्साकशी, म्यूजिकल चेयर, थ्री लेग रेस तथा मटकी फोड़ जैसी रोचक एवं मनोरंजक स्पर्धाएं शामिल होंगी। व्यवसाय प्रशासन विभाग के अनुसार यह महोत्सव केवल एक आयोजन नहीं, बल्कि विद्यार्थियों को नवाचार की दिशा को प्रेरित करने का सशक्त मंच बनेगा जो विकसित भारत, आत्मनिर्भर भारत के विजन को भी सुदृढ़ करेगा। महाविद्यालय प्रशासन एवं आयोजन समिति ने सभी विद्यार्थियों, शिक्षकों से इस प्रबंधन महोत्सव में सक्रिय सहभागिता की अपील की है।

नवोदय चयन परीक्षा में 696 छात्र होंगे शामिल

जागरण, रीवा। जवाहर नवोदय विद्यालय में कक्षा नवमीं एवं ग्यारहवीं के लिए चयन परीक्षा 2026 का आयोजन 7 फरवरी यानी आज आयोजित होगी। परीक्षा के लिए जिले में मात्र एक केन्द्र ही बनाया गया है। विद्यालय में प्रवेश के लिए कक्षा नवमीं में 649 और कक्षा ग्यारहवीं के लिए 57 छात्र-छात्राओं ने पंजीयन कराया है। कुल 696 छात्र परीक्षा देंगे। जवाहर नवोदय विद्यालय चयन परीक्षा के लिए शिक्षा विभाग के द्वारा तैयारियां की जा चुकी है। बताया गया है कि जवाहर नवोदय विद्यालय में कक्षा नवमीं एवं ग्यारहवीं के लिए चयन परीक्षा 2026 का आयोजन किया जा रहा है। जिन छात्र-छात्राओं ने प्रवेश के लिए ऑनलाइन रजिस्ट्रेशन किया है, वे सभी छात्र-छात्राएं नवोदय विद्यालय की वेबसाइट पर जाकर अपना प्रवेश पत्र डाउनलोड कर सकते हैं। परीक्षा का आयोजन आज सुबह 10 बजे से 1.45 बजे तक किया जाएगा। जिला शिक्षा विभाग और नवोदय विद्यालय पदमी के द्वारा कक्षा 9 वीं और कक्षा 11 वीं के लिए आयोजित होने वाली चयन परीक्षा की तैयारियां पूरी की जा चुकी हैं। इसके लिए परीक्षा केंद्र में सभी जरूरी इंतजाम कराए जा चुके हैं। परीक्षा आयोजित कराने के लिए सीएलओ और सीएस के नियुक्तियां भी की गई हैं ताकि परीक्षा में पारदर्शिता रहे। इसके लिए परीक्षा केंद्रों के निरीक्षण के लिए उड़नदस्ता दल का भी गठन किया गया है जो केंद्रों में जाकर औचक निरीक्षण करेंगे।

सेन्ट्रल एकेडमी सीनियर सेकेंडरी स्कूल बनाया गया है सेंटर

बीएएमएस द्वितीय वर्ष की परीक्षाओं की तारीखें बदलीं

रीवा। एमपीएमएसयू ने बीएमएमएस द्वितीय वर्ष के छात्रों के लिए इसी माह आयोजित होने वाली बीएमएमएस सेकेंड प्रोफेशनल मेन एवं सप्लीमेंट्री और बीएएमएस सेकेंड ईयर सप्लीमेंट्री और एक्सएनु परीक्षाओं के प्रथम एवं द्वितीय प्रश्न पत्र की तिथियों में संशोधन किया है। विश्वविद्यालय द्वारा जारी अधिसूचना के अनुसार द्रव्यगुण विज्ञान-1 का पेपर अब 6 मार्च को और द्रव्यगुण विज्ञान-2 का पेपर 9 मार्च को आयोजित होगा। विश्वविद्यालय ने स्पष्ट किया है कि केवल उक्त दो विषयों की तिथियों में परिवर्तन किया गया है, शेष समय-सारणी यथावत रहेगी। इसके साथ ही परीक्षा फॉर्म भरने की अंतिम तिथि 7 फरवरी निर्धारित की गई है। विलंब शुल्क के साथ छात्र 9 फरवरी तक अपना आवेदन जमा कर सकेंगे।

595 छात्रों के आवेदन अब तक नहीं हुए वैरीफाइड

जागरण,रीवा। कलेक्टर प्रतिभा पाल ने महाविद्यालयों में छात्रवृत्ति के लंबित आवेदनों को तत्काल वेरीफाई करने के निर्देश दिए हैं। कलेक्टर ने डीन अवधेश प्रताप सिंह विश्वविद्यालय तथा मेडिकल कॉलेज, प्राचार्य इंजीनियरिंग कॉलेज, पशु चिकित्सा एवं पशुपालन कॉलेज, आयुर्वेद महाविद्यालय, आईटीआई तथा अन्य महाविद्यालयों को छात्रवृत्ति के लंबित आवेदनों को अविलंब वेरीफाई करने के निर्देश दिए हैं। कलेक्टर ने कहा है कि महाविद्यालयों में वर्ष 2024-25 के अनुसूचित जनजाति के 465 एवं जनजाति वर्ग के 130 छात्रों के छात्रवृत्ति के आवेदन वेरीफाई न होने के कारण भुगतान के लिए लंबित हैं। जिसके कारण सीएम हेल्पलाइन और जनसुनवाई में शिकायतें की जा रही हैं और इससे विभाग एवं जिले की ग्रेडिंग भी प्रभावित हो रही है। इस संबंध में नोडल प्राचार्यों को पूर्व में निर्देशित किया गया था, लेकिन प्राचार्यों द्वारा इसे गंभीरता से नहीं लिया गया। राज्य स्तरीय समीक्षा बैठक में भी महाविद्यालयीन छात्रवृत्ति के भुगतान न होने पर नाराजगी व्यक्त की गई है। कलेक्टर ने संबंधितों को निर्देशित किया है कि छात्रवृत्ति और आवास सहायता के आवेदनों का शत-प्रतिशत वेरीफाई करना सुनिश्चित करें। प्रकरण लंबित पाए जाने पर संबंधित नोडल व प्राचार्य के खिलाफ अनुशासनात्मक कार्रवाई की जाएगी, जिसके लिए वे स्वयं जिम्मेदार होंगे।

एसआईआर कार्य में लगे शिक्षकों को ई-अटेंडेंस से रहेगी छूट

कलेक्टर ने जिला शिक्षा अधिकारी को जारी किए निर्देश

जागरण,रीवा। फोटो निर्वाचक नामावलियों के विशेष गहन पुनरीक्षण (एसआईआर) कार्य में लगे शिक्षकों को ई-अटेंडेंस से छूट दी गई है। इस आशय के निर्देश कलेक्टर एवं जिला निर्वाचन अधिकारी प्रतिभा पाल ने जिला शिक्षा अधिकारी को जारी कर दिए हैं। कलेक्टर ने डीईओ को जारी निर्देश में कहा है कि एसआईआर की कार्यवाही में नियुक्त लोकसेवकों को ई-अटेंडेंस से छूट प्रदान करते हुए उनका नियमित वेतन भुगतान सुनिश्चित करें। उल्लेखनीय है कि भारत निर्वाचन आयोग और मुख्य निर्वाचन पदाधिकारी भोपाल द्वारा जारी निर्देशों के अनुसार जिले के विधानसभा क्षेत्रों में फोटो निर्वाचक नामावली के विशेष गहन पुनरीक्षण की कार्यवाही प्रचलित है। इस कार्य को बीएलओ और सहायक बीएलओ द्वारा मतदान केन्द्रों में उपस्थित रहकर कराया जा रहा है और बीएलओ सुपरवाइजर द्वारा उनके कार्यों की मानीटरिंग की जा रही है। इसके साथ ही जिला निर्वाचन कार्यालय, विधानसभा क्षेत्रों के निर्वाचक रजिस्ट्रीकरण एवं सहायक रजिस्ट्रीकरण अधिकारी कार्यालयों तथा अन्य विभागों के कर्मचारी भी निर्वाचन कार्य के लिए संबद्ध किए गए हैं। इस कार्य के लिए शिक्षा विभाग के अधिकांश लोकसेवकों को बीएलओ, सहायक बीएलओ, बीएलओ सुपरवाइजर बनाया गया है। कर्मचारियों द्वारा इस कार्य को फील्ड में अथवा निर्धारित स्थल पर उपस्थित रहकर संपन्न करना है। जिसके कारण शिक्षा विभाग के लोकसेवकों द्वारा उक्त कार्य के साथ-साथ अपने मूल संस्था में उपस्थित होकर ई-अटेंडेंस लगाना संभव नहीं है। जिसके कारण कलेक्टर ने शिक्षा विभाग के लोकसेवकों को ई-अटेंडेंस में छूट देने और उनका नियमित वेतन भुगतान सुनिश्चित करने के निर्देश दिए हैं।